

摘藻堂四庫全書薈要

史部

欽定四庫全書薈要卷五千六百四十五

史部

宋史卷十七

元中書右丞相總裁托克托等修

本紀第十七

哲宗一

哲宗憲元繼道顯德定功欽文睿武齊聖昭孝皇帝諱
照神宗第六子也母曰欽聖皇后朱氏熙寧九年十二
月七日己丑生于宮中赤光照室初名傭授檢校太尉

天平軍節度使封均國公元豐五年遷開府儀同三司
彰武軍節度使進封延平郡王七年三月神宗宴羣臣
于集英殿王侍立天表粹溫進止中度宰相而下再拜
賀八年二月神宗寢疾宰相王珪乞早建儲為宗廟社
稷計又奏請皇太后權同聽政神宗首肯三月甲午朔
皇太后垂簾于福寧殿諭珪等曰皇子性莊重從學穎
悟自皇帝服藥手寫佛書為帝祈福因出以示珪等所
書字極端謹珪等稱賀遂奉制立為皇太子初太子宮

中常有赤光至是光益熾如火戊戌神宗崩太子即皇
帝位己亥大赦天下常赦所不原者羣臣進秩賜賚諸
軍遣使告哀于遼白虹貫日庚子尊皇太后曰太皇太
后皇后曰皇太后德妃朱氏曰皇太妃命宰臣王珪為
山陵使甲寅以羣臣固請始同太皇太后聽政己未賜
叔雍王顥曹王顥贊拜不名令中外避太皇太后父遵
甫名詔邊事稍重者樞密院與三省同議以進庚申尚
書左僕射郇國公王珪進封岐國公顥進封揚王顥為

荆王並加太保弟寧國公佖為遂寧郡王儀國公佖為
太寧郡王成國公佖為咸寧郡王和國公似為普寧郡
王高密郡王宗晟漢東郡王宗瑗華原郡王宗愈安康
郡王宗隱建安郡王宗綽並為開府儀同三司太師潞
國公文彥博為司徒濟陽郡王曹佺為太保特進王安
石為司空餘進秩賜致仕服帶銀帛有差辛酉詔顏子
孟子配享孔子廟庭夏四月丙寅初御紫宸殿辛未蠲
元豐六年以前逋賦甲戌加李乾德同中書門下平章

事董璫檢校太尉詔曰先皇帝臨御十有九年建立政
事以澤天下而有司奉行失當幾於煩擾或苟且文具
不能布宣實惠其申諭中外協心奉令以稱先帝惠安
元元之意乙亥詔以太皇太后生日為坤成節丁丑召
呂公著侍讀諭樞密中書通議事都堂詔遵先帝制遣
官察舉諸路監司之法庚辰呂惠卿遣兵入西界破六
砦斬首六百餘級辛巳遣使以先帝遺留物遺遼國及
告即位甲申水部員外郎王諤非職言事坐罰金丙戌

以蕃官高福戰死錄其子孫丁亥復蠲舊年逋賦五月
丙申詔百官言朝政闕失資政殿學士司馬光過闕入
見丁酉羣臣請以十二月七日為興龍節壬寅城熙蘭
通遠軍賜李憲趙濟銀帛有差甲辰作受命寶丙午京
師地震復置遼州庚戌王珪薨改命蔡確為山陵使丙
辰賜禮部奏名進士諸科及第出身四百六十一人戊
午以蔡確為尚書左僕射兼門下侍郎韓縝為尚書右
僕射兼中書侍郎章惇知樞密院司馬光為門下侍郎

六月庚午賜楚州孝子徐積絹米丁亥詔中外臣庶許直言朝政闕失民間疾苦秋七月戊戌以資政殿大學士呂公著為尚書左丞詔府界三路保甲罷團教丙午遼人來弔祭丙辰白虹貫日吏部侍郎熊本奏歸化儂知會異同坐罰金罷沅州增修堡砦八月乙丑詔按察官所至有才能顯著者以名聞己巳鎮江軍節度使韓絳進開府儀同三司癸酉遣使賀遼主生辰正旦乙亥以供奉王英戰死葭蘆錄其子九月戊戌以神宗英文

烈武聖孝皇帝之謚告于天地宗廟社稷己亥上寶冊
于福寧殿己酉遣使報謝于遼冬十月甲子夏國遣使
進助山陵馬癸酉詔倣唐六典置諫官丁丑令侍從各
舉諫官二人詔監察御史兼言事殿中侍御史兼察事
罷義倉己卯詔均寬民力有司或致廢格者監司御史
糾劾之河決大名乙酉葬神宗皇帝于永裕陵丙戌罷
方田以夏國主母卒遣使弔祭十一月癸巳詔按問強
盜欲舉自首者毋減丁酉祧翼祖祔神宗于太廟廟樂

曰大明之舞辛丑減兩京河陽囚罪一等杖已下釋之
民緣山陵役者蠲其賦己酉遼遣使賀即位十二月壬
戌于闐進獅子詔却之開經筵講魯論讀三朝寶訓罷
太學保任同罪法丙寅夏人以其母遺留物馬白駝來
獻辛未左僕射蔡確右僕射韓縝並遷秩加食邑揚王
顥荆王顥並為太傅壬申章惇司馬光等進秩有差甲
戌罷後苑西作院乙亥詔執政侍臣講讀戊寅罷增置
鑄錢監十有四乙酉遼遣蕭睦等來賀正旦是歲日有

五色雲者六高麗大食入貢

元祐元年春正月庚寅朔改元丙子錄在京囚減死罪以下一等杖罪者釋之丁未詔回賜高麗王鞍馬服帶器幣有加罷陝西河東元豐四年後凡緣軍興添置官局丙辰久旱幸相國寺祈雨立神宗原廟戊午甘露降二月辛酉以河決大名壞民田民艱食者衆詔安撫使韓絳振之乙丑修神宗實錄丁卯詔左右侍從各舉堪任監司者二人舉非其人有罰庚午禁邊民與夏人為

市辛未董氈卒以其子阿里骨襲河西軍節度使邈川
首領庚辰夏人入貢辛巳刑部侍郎蹇周輔坐變鹽法
落職閏月庚寅蔡確罷以司馬光為尚書左僕射門下
侍郎詔韓維呂大防孫永范純仁詳定役法壬辰以呂
公著為門下侍郎丙午守尚書右丞李清臣為尚書左
丞試吏部尚書呂大防為尚書右丞白虹貫日丁未羣
臣上太皇太后宮名曰崇慶殿曰崇慶壽康皇太后宮
曰隆祐殿曰隆祐慈徽庚戌賜于闐國王服帶器幣辛

亥章惇罷甲寅詔侍從御史國子司業各舉經明行修
可為學官者二人乙卯以吏部尚書范純仁同知樞密
院事丙辰掩京城暴骸罷諸州常平管勾官三月辛未
詔毋以堂差衝在選已注官置訴理所許熙寧以來得
罪者自言命太學公試司業博士主之如春秋補試法
癸酉置開封府界提點刑獄一員乙亥罷熙河蘭會路
經制財用司已卯復廣濟河輦運辛巳詔民間疾苦當
議寬恤者監司具聞以程頤為崇政殿說書乙酉許職

事官帶職夏四月己丑韓縝罷辛卯詔諸路旱傷蠲其
租壬辰以旱慮囚癸巳王安石薨辛丑詔執政大臣各
舉可充館閣者二人壬寅以呂公著為尚書右僕射兼
中書侍郎文彥博平章軍國重事乙巳詔戶部裁冗費
著為令李憲等以用兵失利為劉摯所劾貶秩奉祠辛
亥揚王顥荆王頤並特授太尉詔遇科舉令升朝官各
舉經明行修之士一人俟登第日與升甲罷謁禁之制
知誠州周士隆撫納溪洞民一千三百餘戶賜士隆銀

帛癸丑定六曹郎官員數五月丁巳朔以資政殿大學士韓維為門下侍郎罷諸路重祿復熙寧前舊制庚申夏人來賀即位壬戌詔侍從臺官監司各舉縣令一人戊辰命程頤同修立國子監條制己巳幸揚王荆王第官其子九人癸酉復左右天廐坊壬午詔文彥博班宰相之上六月甲辰置春秋博士呂惠卿落職分司南京蘇州居住戊申以富弼配享神宗廟庭庚戌太白晝見甲寅詔正風俗修紀綱勿理隱疵細故復置通利軍程

頤上疏論輔養君德秋七月丁巳置檢法官辛酉設十
科舉士法劉恕同修資治通鑑未沾恩而卒詔官其子
乙丑夏國主秉常卒庚午夏國遣使賀坤成節八月辛
卯詔常平依舊法罷青苗錢壬辰封弟偲為祁國公甲
午占城國遣使入貢壬子日傍有五色雲磁州穀異隴
同穗九月丙辰朔司馬光薨己未朝獻景靈宮辛酉大
享明堂以神宗配赦天下丁卯試中書舍人蘇軾為翰
林學士知制誥己卯張璪罷冬十月丙戌改衍聖公為

奉聖公庚寅太白晝見壬辰夏人來告哀庚子遣使弔
祭十一月戊午以尚書左丞呂大防為中書侍郎御史
中丞劉摯為尚書右丞乙亥于闐國遣使入貢庚辰蠲
鹽井官溪錢十二月庚寅詔將來服除依元豐三年故
事羣臣勿上尊號戊戌華州鄭縣小敷谷山崩戊申詔
以冬溫無雪決繫囚是歲河北楚海諸州水

二年春正月乙丑封秉常子乾順為夏國主戊辰詔舉
人程試主司毋得於老莊列子書命題辛巳詔蘇轍劉

攷編次神宗御製白虹貫日二月丁亥遣左司諫朱光庭使河北振民被災者詔施黥戎瀘等州保甲監司免歲閏丁酉加賜于闐國金帶錦袍器幣己亥命吏部選人改官歲以百人為額辛丑詔陝西河東行策應牽制法是月代州地震三月壬戌太皇太后手詔止就崇政殿受冊戊辰詔中外侍從歲舉郡各一人令御史臺察民俗奢僭者夏人遣使入謝癸酉奉安神宗神御于景靈宮宣光殿庚辰詔內侍省供奉官以下百人為額夏

四月丙戌交趾入貢丁亥鬼章子結齧齧寇洮東戊子
慮囚己丑詔太師文彥博十日一議事都堂辛卯詔冬
夏旱暵海內被災者廣避殿減膳責躬思過以圖消復
丁酉以四方牒訴上尚書者或冤抑不得直令御史分
察之己亥太皇太后以旱權罷受冊禮癸卯雨乙丑以
徐州布衣陳師道為亳州司戶叅軍丁未復制科戊申
御殿復膳李清臣罷五月癸丑夏人圍南川砦丁卯以
劉摯為尚書左丞兵部尚書王存為尚書右丞壬申于

闐入貢丁丑詔御史官闕中丞御史翰林學士兩省諫
議大夫以上雜舉六月辛丑以安燾知樞密院事壬寅
有星如瓜出文昌丙午邈川首領結藥來降授三班奉
職秋七月辛亥詔戶部修會計錄韓絳以司空致仕夏
人寇鎮戎軍詔府界三路教閱保甲復課利場務虧額
科罰丙辰罷諸州數外歲貢戊午以遼蕭德崇等賀坤
成節曲宴垂拱殿始用樂庚申進封李乾德為南平王
辛酉改誠州為渠陽軍辛未韓維罷八月辛巳程頤罷

經筵權同管勾西京國子監癸未以西蕃寇洮河民被害者給錢粟死者賜帛其家詔復進納人改官舊法乙酉命呂大防為西京安奉神宗御容禮儀使庚寅西南蕃遣人入貢癸巳以夏國政亂主幼強臣乙逋等擅權逆命詔諸路帥臣嚴兵備之庚子授西蕃首領心牟欽犂銀州團練使溫溪心瓜州團練使辛丑涇原言夏人寇三川諸砦官軍敗之丁未岷州行營將种誼復洮州執蕃酋鬼章青宜結九月乙卯發太皇太后冊寶于大

慶殿丙辰發皇太后皇太妃冊寶于文德殿己未夏人
寇鎮戎軍丁卯禁私造金箔冬十月壬午奉安神宗御
容于會聖宮及應天院癸未日有五色雲戊子恭謝景
靈宮辛卯減西京囚罪一等杖已下釋之己亥西南龍
張蕃遣人入貢庚子論復洮州功种誼等遷秩賜銀絹
有差十一月丙辰復置漣水軍庚申獻鬼章于崇政殿
以罪當死聽招其子及部屬歸以自贖乙亥大雪甚民
凍多死詔加振恤死無親屬者官瘞之罷內殿承制試

換文資格丙子決囚十二月乙酉賜諸軍及貧民錢丙戌興龍節初上壽于紫宸殿己丑大寒罷集英殿宴壬辰元征聲延部族老幼萬人渡河南遣使廩食之仍諭聲延勿失河北地乙未白虹貫日壬寅頒元祐勅令式是冬始閉汴口

三年春正月己酉朔不受朝庚戌復廣惠倉己未朝獻景靈宮庚申雪寒發京西穀五十餘萬石損其直以紓民辛酉詔廣南西路朱崖軍開示恩信許生黎悔過自

新壬戌罷上元遊幸壬申阿里骨奉表詣闕謝罪令邊
將無出兵仍罷招納甲戌決囚二月甲申罷修金明池
橋殿乙酉德音減囚罪一等徒以下釋之工役權放一
年流民飢貧量與應副丙戌詔河東苦寒量度存恤戊
兵癸巳罷春宴乙未白虹貫日辛丑太白晝見乙巳廣
東兵馬監童政坐擅殺無辜伏誅三月丙辰韓絳薨丁
巳御集英殿策進士戊午策武舉己巳賜禮部奏名進
士諸科及第出身一千一百二十二人乙亥夏人寇德

靜若將官張誠等敗之夏四月戊寅令諸路郡邑具役
法利害以聞辛巳以呂公著為司空同平章軍國事呂
大防為尚書左僕射兼門下侍郎范純仁為尚書右僕
射兼中書侍郎壬午以觀文殿學士孫固為門下侍郎
劉摯為中書侍郎王存為尚書左丞御史中丞胡宗愈
為尚書右丞戶部侍郎趙瞻簽書樞密院事癸巳詔定
職事官歲舉升陟人數丁酉阿里庫來貢庚子詔天下
郡城以地里置壯城兵額禁勿他役五月癸亥漢東郡

王宗瑗薨六月癸未詔司諫正言殿中監察御史倣故事以升朝官通判資序歷一年者為之辛丑夏人寇塞門砦甲辰五色雲見秋七月戊申荆王頽薨戊辰夜東北方明如晝俄成赤氣中有白氣經天辛未太白晝見癸酉忠州言臨江塗井鎮雨黑黍八月戊寅阿里庫入貢己卯進封揚王顥為徐王辛巳復置荆門軍丙戌罷吏試斷刑法丁酉渠陽蠻入寇辛丑降繫囚罪一等杖以下釋之九月庚申禁宗室聯姻內臣家乙丑阿里庫

復遷職加封邑詔觀察使以上給永業田丁卯御集英
殿策賢良方正能直言極諫科十月丙戌詔罷新創諸
堡砦廢渠陽軍戍戌復南北宣徽院十一月甲辰遣吏
部侍郎范百祿等行河丁卯大食麻囉拔國入貢詔歲
以十月給巡城兵衣裘十二月丁酉渝州獵人寇小溪
壬寅白虹貫日閏月癸卯朔頒元祐式甲辰范鎮定鑄
律度量鐘磬等以進令禮部太常參定戊申減宰執賜
予庚申置六曹尚書權官丙寅詔吏部詳定六曹重複

利害以聞是歲三佛齊于闐西南蕃入貢天下上戶部
主戶二百一十三萬四千七百三十三丁二千八百五
十三萬三千九百三十四客戶六百一十五萬四千六
百五十二丁三百六十二萬九千八十三斷大辟二千
九百一十五人

四年春正月壬申朔不受朝羣臣及遼使詣東上閤門
內東門拜表賀丙子宴遼使于紫宸殿甲申以夏人通
好詔邊將毋生事二月甲辰呂公著薨庚戌白虹貫日

乙卯夏人來謝封冊三月己卯作渾天儀胡宗愈罷丁亥以不雨罷春宴己丑詔自今大禮毋上尊號辛卯晝有流星出東方癸巳錄囚乙未罷幸瓊林苑金明池夏四月乙巳呂大防等以久旱求罷不允丁未曹佺薨戊申罷大禮使及奏告執政加賜戊午立試進士四場法壬戌弛在京牧地與民五月癸酉詔自今侍讀以三月為額中丞李常侍御史盛陶坐不論蔡確改官辛巳貶觀文殿學士蔡確為光祿卿丁亥復貶確為英州別駕

安置新州丁酉于闐國來貢六月甲辰范純仁王存罷
丙午以趙瞻同知樞密院事戶部尚書韓忠彥為尚書
左丞翰林學士許將為尚書右丞丁未夏國來貢癸丑
邈黎國般次冷移四林栗迷等齎于闐國黑汗王及其
國蕃王表章來貢秋七月丙子詔復外都水使者丁丑
遼國使蕭寅等來賀坤成節曲宴垂拱殿庚辰安燾以
母憂去位八月壬寅勅郡守貳以四善三最課縣令吏
部歲上監司考察知州狀辛酉太皇太后詔今後明堂

大禮母令百官拜表稱賀九月戊寅致齋垂拱殿己卯
朝獻景靈宮辛巳大饗明堂赦天下百官加恩賜賚士
庶高年九十以上者乙酉加賜韓縝范純仁器幣有差
乙未檢舉先朝文武七條戒諭百官遵守冬十月辛丑
西南程蕃入貢丁未龍蕃入貢戊申翰林學士蘇轍上
神宗御集藏寶文閣癸丑御邇英殿講官進講三朝寶
訓十一月庚午勅朝請大夫以下進士為左餘為右溪
洞彭儒武等進溪洞布癸未以孫固知樞密院事劉摯

為門下侍郎吏部尚書傅堯俞為中書侍郎乙酉有星
色赤黃尾跡燭地己丑太皇太后却元日賀禮令百官
拜表庚寅張惇買田不法降官辛卯改發運轉運提刑
預妓樂宴會徒二年法十二月庚子遼使耶律等賀興
龍節曲宴垂拱殿癸丑更定朝儀二舞曰威加四海化
成天下甲寅減廊延等路戍兵歸營戊午以御史闕令
中丞兩省各舉二人是歲夏國邈黎大食麻羅拔國入
貢

五年春正月丁卯朔御大慶殿視朝丁丑朝獻景靈宮
二月丁酉罷諸州軍通判奏舉改官己亥夏人歸永樂
所掠吏士百四十九人庚子加溪洞人田忠進等九十
二人檢校官有差辛丑以旱罷修黃河癸卯禱雨獄瀆
罷浚京城壕丁未減天下囚罪杖以下釋之庚戌文彥
博以太師充護國軍山南西道節度等使致仕令所司
備禮冊命壬子彥博乞免冊禮從之甲子宴餞文彥博
于玉津園三月丙寅朔趙瞻薨丁卯詔賜故孫覺家緡

錢令給喪事壬申以韓忠彥同知樞密院事翰林學士承旨蘇頌為尚書左丞癸未罷春宴壬辰罷幸金明池瓊林苑夏四月癸卯詔鄭穆王巖叟等同舉監察御史二月甲辰呂大防等以旱求退不允丙午孫固薨癸丑詔講讀官御經筵退留二員奏對邇英閣丁巳詔以旱避殿減膳罷五月朔日文德殿視朝辛酉以保寧軍節度使馮京為檢校司空五月壬申詔差役法有未備者令王巖叟等具利害以聞乙亥雨已卯御殿復膳六月

辛丑錄囚癸亥晝有五色雲七月壬申涇原路經略司
言諸人違制典買蕃部田土許以免罪自二頃五十畝
以下責其出刺弓箭手及買馬備邊用各有差乙酉夏
人來議分畫疆界九月丁丑詔復置集賢院學士冬十
月癸巳罷提舉修河司丁酉詔定州韓琦祠載祀典十
二月辛卯朔許將罷安康郡王宗隱薨丙辰禁軍大閱
賜以銀牒匹帛罷轉資是歲東北旱浙西水災賜宗室
子授官者四十四人斷大辟四千二百六十有一高麗

于闐龍蕃三佛齊阿里庫入貢

六年春正月辛酉朔不受朝羣臣及遼使詣東上閤門
內東門拜表賀癸酉詔祠祭游幸母用羔二月辛卯以
劉摯為尚書右僕射兼中書侍郎龍圖閣待制王巖叟
簽書樞密院事癸巳以蘇轍為尚書右丞宗室士覲追
封魏國公庚子拂林國來貢丁丑授阿里庫男溪邦彪
錢為化外庭州團練使三月癸亥呂大防上神宗實錄
己巳御集英殿策進士庚午策武舉癸酉詔御史中丞

舉殿中侍御史二人翰林學士至諫議大夫同舉監察御史二人丙子呂大防特授右正議大夫壬午賜禮部奏名進士諸科及第出身九百五十七人丁亥罷幸金明池瓊林苑夏四月乙未復置通禮科丙申詔恤刑辛丑詔大臣堂除差遣非行能卓異者不可輕授仍搜訪遺材以備擢任夏人寇熙河蘭岷廊延路壬寅太白晝見壬子賜南平王李乾德袍帶金帛鞍馬五月己未朔日有食之罷文德殿視朝庚辰詔娶宗室女得官者毋

過朝散大夫皇城使丁亥從省上元祐勅令格六月壬辰錄囚甲辰置國史院修撰官乙卯詔以田思利為銀青光祿大夫充溪洞都巡檢秋七月癸亥復張方平宣徽南院使致仕乙丑復制置解監使己卯振兩浙水災八月己丑三省進納后六禮儀制辛卯詔御史臺臣僚親亡十年不葬許依條彈奏及令吏部檢察己亥改宗正屬籍曰宗蕃慶系錄令文武臣出入京城門書職位差遣姓名及所往己酉修神宗實訓癸丑詔廊延路都

監李儀等以違旨夜出兵入界與夏人戰死不贈官餘
官降等乙卯夏人寇懷遠砦閏月壬戌嚴飭陝西河東
諸路邊備甲子太白晝見庚午詔御史中丞舉殿中侍
御史二人翰林學士中書舍人給事中舉監察御史四
人壬申太子太保致仕張方平辭免宣徽使不允甲申
刑部侍郎彭汝礪與執政爭獄事自乞貶逐詔改禮部
侍郎九月丁亥夏人寇麟府二州壬辰詔州民為寇所
掠廬舍焚蕩者給錢帛踐稼者振之失牛者官貸市之

癸巳御集英殿策賢良方正能直言極諫科丁酉御試
方正王普等遷官有差歲出內庫緡錢五十萬以備邊
費甲辰幸上清儲祥宮壬子宮成減天下囚罪一等杖
以下釋之癸丑以執政官行謁禁法非便詔有利害陳
述勿禁冬十月丁卯有流星晝出東北庚午朝獻景靈
宮還幸國子監賜祭酒豐稷三品服監學官賜帛有差
庚辰令諸宮院建小學貴妃苗氏薨癸未編修神宗御
製官轉秩加賞詔京西提刑司歲給錢物二十萬緡以

奉陵寢十一月乙酉朔劉摯罷壬辰作元祐觀天歷尚書右丞蘇轍罷知絳州辛丑傅堯俞薨十二月戊辰開封府火壬申范純仁以前禦敵失策降官是歲兩浙水定州野蠶成繭高麗交趾三佛齊入貢

七年春正月甲辰以遼使耶律廸卒輟朝一日乙巳張誠一以穿父墓取犀帶責授左武衛將軍提舉亳州明道宮二月丁卯詔陝西河東邊要進築守禦城砦三月己亥錄囚夏四月己未立皇后孟氏甲子命呂大防為

皇后六禮使甲戌立考察縣令課績法五月戊戌御文
德殿冊皇后庚子罷侍從官轉對丙午王巖叟罷知鄭
州大食進火浣布六月辛酉以呂大防為右光祿大夫
蘇頌為尚書右僕射兼中書侍郎韓忠彥知樞密院事
蘇轍為門下侍郎翰林學士范百祿為中書侍郎翰林
學士梁燾為尚書左丞御史中丞鄭雍為尚書右丞戶
部尚書劉奉世簽書樞密院事甲子置廣文館解額戊
辰渾天儀像成甲戌日旁五色雲見七月癸巳詔修神

宗史復翰林侍講學士己酉詔諸路安撫鈐轄司及西
京南京各賜資治通鑑一部庚戌宗室總麻以上者禁
析居八月丙辰罷監酒稅務增剩給賞法己未詔西邊
諸將嚴備毋輕出兵乙亥戒邊將毋掊克軍士前陷交
趾將吏蘇佐等十七人自拔來歸九月戊戌詔冬至日
南郊宜依故事設皇地祇禮畢別議方澤之儀以聞己
酉永興軍蘭州鎮戎軍地震冬十月庚戌朔環州地震
丁巳陝西有前代帝王陵廟處給民五家充守陵戶丁

知夏人寇環州十一月辛巳太白晝見甲申詔大中大
夫以上許占永業田丙戌于闐入貢庚寅帝齋大慶殿
辛卯朝獻景靈宮壬辰饗太廟癸巳祀天地于圜丘赦
天下羣臣中外加恩罷兩京榷酒民罹親喪者戶以差
等與免徭辛丑賜徐王劍履上殿十二月辛亥阿里骨
李乾德加食邑實封甲子罷飲福宴庚午祈雪是歲充
州僊源縣生瑞穀高麗占城西南蕃龍氏羅氏入貢
八年春正月己卯朔不受朝甲申蔡確卒丁亥御邇英


閣召宰臣讀寶訓庚寅詔復范純仁大中大夫壬辰幸
太乙宮庚子詔頒高麗所獻黃帝鍼經于天下二月己
酉詔西南蕃龍氏遷秩補官辛亥禮部尚書蘇軾言高
麗使乞買歷代史及策府元龜等書宜却其請不許省
臣許之軾又疏陳五害極論其不可有旨書籍曾經買
者聽壬子詔刑部不得分禁繫人數瘐死數多者申尚
書省癸丑詔太寧郡王以下出就外學三月甲申蘇頌
罷辛卯范百祿罷庚子詔御試舉人復試賦詩論三題

夏四月丁未朔夏人來謝罪願以蘭州易塞門若不許
癸丑詔恤刑甲寅令范祖禹依先朝故事止兼侍講丁
巳詔南郊合祭天地罷禮部集官詳議五月癸未置蘄
州羅田縣丁亥罷二廣鑄折二錢己丑錄囚辛卯監察
御史董敦逸黃慶基以論蘇軾蘇轍罷為湖北福建轉
運判官己亥祁國公偁為開府儀同三司六月戊午梁
燾罷壬戌中書後從省上元祐在京通用條貫秋七月
丙子朔以觀文殿大學士范純仁為尚書右僕射兼中

書侍郎戊寅令陝西沿邊鐵錢銅錢悉還近地八月丁未久雨禱山川辛酉以太皇太后疾帝不視事壬戌遣使按視京東西河南北淮南水災癸亥減京師囚罪一等徒以下釋之丁卯禱于獄瀆宮觀祠廟戊辰赦天下庚午詔陝西復鑄小銅錢辛未禱于天地宗廟社稷乙亥禱于諸陵九月戊寅太皇太后崩己卯詔以太皇太后園陵為山陵庚辰遣使告哀于遼甲申命呂大防為山陵使壬辰詔山陵修奉從約諸道毋妄有進助冬十

月戊申羣臣七上表請聽政戊辰徐王顥乞解官給喪
詔不允庚午復內侍劉瑗等六人十一月丙子始御垂
拱殿乙未以雪寒振京城民飢壬寅賜勞修奉山陵兵
士十二月乙巳范純仁乞罷不允甲寅倣唐六典修官
制丁巳遼人遣使來弔祭出錢粟十萬振流民己巳上
太皇太后謚曰宣仁聖烈皇后是歲河入德清軍決內
黃口

宋史卷十七



總校官庶吉士臣張能照

校對官檢討臣蕭九成

謄錄監生臣張耀臺

欽定四庫全書叢要

史部

宋史卷

十八至
二十



詳校官編修臣王天祿

欽定四庫全書薈要卷五千六百四十六

史部

宋史卷十八

元中書右丞相總裁托克托等修

紀第十八

哲宗二

紹聖元年春正月癸酉朔羣臣詣西上閣門進名奉慰
丙申夏人來貢辛丑遣中書舍人呂希純等行河罷河
東大銅錢二月丁未以戶部尚書李清臣為中書侍郎

兵部尚書鄧潤甫為尚書右丞己酉葬宣仁聖烈皇后
于永厚陵己未祔神主于太廟癸亥減兩京河陽鄭州
囚罪一等民緣山陵役者蠲其賦甲子詔依章獻明肅
皇后故事罷避高遵惠諱三月壬申朔日有食之乙亥
呂大防罷庚辰詔大學合格上舍生推恩免省試附科
場春榜乙酉御集英殿策進士丁亥策武舉戊子以徐
王顥為太師徙封冀王癸巳詔振京東河北流民貸以
穀麥種諭使還業蠲是年租稅丁酉賜禮部奏名進士

諸科及第出身九百七十五人蘇轍罷夏四月乙巳朔
阿里骨進獅子丙午以旱詔恤刑己酉詔中外決獄庚
戌詔有司具醫藥治京師民疾壬子蘇軾坐前掌制命
語涉譏訕落職知英州癸丑改元白虹貫日甲寅以王
安石配饗神宗廟庭蔡確追復右正議大夫戊午復新
城兩廂庚申減四京囚罪一等杖以下釋之壬戌以資
政殿學士章惇為尚書左僕射兼門下侍郎范純仁罷
丙寅罷五路經律通禮科丁卯詔諸路復元豐免役法

戊辰同修國史蔡卞請重修神宗實錄閏月壬申復提
舉常平官癸酉罷十科舉士法甲申以觀文殿學士安
燾為門下侍郎丙戌復義倉丁亥詔神宗隨龍人趙世
長等遷秩賜賚有差戊子詔在京諸司所受傳宣中批
並候朝廷覆奏以行乙未西南張蕃遣人入貢丙申命
左僕射章惇提舉修神宗國史丁酉詔添差徐州兵馬
都監五月壬寅罷修官制局甲辰罷進士習試詩賦令
專二經立宏詞科己酉修國史曾布請以王安石日錄

載之神宗實錄太白晝見辛亥劉奉世罷癸丑詔中外
學官非制科進士上舍生入官者並罷編類元祐羣臣
章疏及更改事條甲寅右正言張商英言先帝謂天地
合祭非古詔禮部太常詳議以聞乙丑鄧潤甫卒丁卯
嗣濮王宗暉薨六月甲戌來之邵等疏蘇軾詆斥先朝
詔謫惠州丙子罷置制解鹽使壬午封高密郡王宗晟
為嗣濮王癸未以翰林學士承旨曾布同知樞密院事
甲申除進士引用王安石字說之禁秋七月丁巳以御

史黃履周秩諫官張商英言奪司馬光呂公著贈諡王
巖叟贈官貶呂大防為秘書監劉摯為光祿卿蘇轍為
少府監並分司南京梁燾提舉舒州靈仙觀戊午詔大
臣朋黨司馬光以下各輕重議罰布告天下餘悉不問
議者亦勿復言八月丙戌召輔臣觀稼後苑日有五色
雲壬辰應制科趙天啟以累上書狂妄黜九月癸卯遣
御史劉拯按河北水災振饑民丙午御集英殿策賢良
方正能直言極諫科庚戌罷制科罷廣惠倉癸丑令監

司歲察守臣課績優者以聞甲寅知廣州唐義問坐棄
渠陽砦責授舒州團練副使庚申太白晝見丁卯詔京
東西河北振恤流民戊辰流星出紫微垣冬十月丙申
三佛齊遣使入貢丁酉河北流十一月己亥朔復八路
差官法壬子以冬溫無雪決繫囚蔡確特追復觀文殿
大學士甲寅開封男子呂安斥乘輿當斬貸之丁巳詔
河北振饑諸路恤流亡官吏有善狀才能顯著者以聞
十二月辛未申嚴銅錢出外界法庚辰命諸路祈雪丙

戊滑州浮橋火已丑漳河決溢浸洺磁等州令計置堙
塞甲午范祖禹趙彥若黃庭堅坐史事責授散官永豐
黔州安置是歲京師疫洛水溢太原地震河北水發京
都粟振之

二年春正月甲辰詔國史院增補先帝御集丙午立宏
詞科己未遷奉太平興國寺三朝御容于天章閣乙丑
殿前司奏獄空詔賜緡錢二月乙亥呂大防以監修史
事貶秩分司南京安州居住辛巳出內庫錢帛二十萬

助河北振饑甲午罷廣文館解額三月己亥宗晟薨已未試宏詞黃符等五人各循一資夏四月戊辰詔職事官罷帶職朝請大夫以下勿分左右易集賢院學士為集賢殿修撰直集賢院為直秘閣集賢校理為秘閣校理壬申封華容郡王宗愈為嗣濮王詔許將等七人不限資格各舉才行堪備任使者二人丁亥詔依元豐條置律學博士二員五月乙巳命蔡卞詳定國子監三學及外州州學制乙卯上皇太妃宮名曰聖瑞六月壬辰

禁京師土人輿轎秋七月丙辰詔大理寺復置右治獄
仍依元豐例添置官屬八月壬申命彰信軍節度使宗
景為開府儀同三司封濟陰郡王甲申宗愈薨乙酉錄
趙普後希莊為閤門祗候九月甲午以安定郡王宗綽
為嗣濮王壬寅告遷神宗神御于景靈宮顯承殿癸卯
詣景靈宮行奉安禮戊申加上神宗諡曰紹天法古運
德建功英文烈武欽仁聖孝皇帝己酉朝獻景靈宮庚
戌朝饗太廟辛亥大饗明堂赦天下冬十月甲子鄭雍

罷癸酉告遷宣仁聖烈皇后神御于景靈宮徽音殿甲戌詣宮行奉安禮以吏部尚書許將為尚書左丞翰林學士蔡卞為尚書右丞辛巳進封冀王顥為楚王辛卯河南府地震十一月乙未安燾罷知河南府丙申太白晝見戊戌范鍔自轉運使入對言有捕盜功乞賜章服帝曰捕盜常職也何足言功黜知壽州甲寅梁惟簡除名全州安置丙辰贈蔡確為太師賜諡忠懷十二月乙丑復置監察御史三人分領六察不言事令翰林學士

蔡京御史中丞黃履各舉御史二人壬申白虹貫月戊子詔如元豐例孟月朝獻景靈宮是歲蘇州夏秋地震桂陽監慶雲見出宮女九十一人交趾三佛齊韋蕃阿里骨入貢

三年春正月庚子韓忠彥罷知真定府甲辰朝獻景靈宮遍詣諸殿如元豐禮庚戌引見蕃官包順包誠等賜賚有差詔鞠獄非本章所指而蔓求他罪者論如律乙卯詔戶部尚書勿領右曹戊午詔罷合祭間因大禮之

歲夏至日躬祭地祇於北郊二月癸亥出元豐庫緡錢
四百萬于陝西河東耀邊儲辛未復元豐恤孤幼令癸
酉罷富弼配饗神宗廟庭癸未詔封濮王子未王者三
人宗楚為南陽郡王宗祐為景城郡王並開府儀同三
司宗漢為東陽郡王乙酉宗緯薨丙戌詔三歲一取旨
遣郎官御史按察監司職事丁亥夏人寇義合砦三月
壬辰以禁中屢火罷春宴及幸池苑不御垂拱殿三日
癸巳夏人圍塞門砦丁酉尚書省火戊午劍南東川地

震己亥封宗楚為嗣濮王辛亥封大寧郡王佖為申王
遂寧郡王佖為端王丁巳韋申王端王府夏四月辛酉
罷宣徽使丙子詔自今景靈宮四孟朝獻分為二日五
月壬子太白晝見丙辰錄囚六月癸亥令真定立趙普
廟乙酉立北郊齋宮於端聖園秋七月庚戌依元豐職
事官以行守試三等定祿秩罷元祐所增聚義錢甲寅
令熙河立王韶廟八月辛酉夏人寇寧順砦壬戌日上
有五色暈下有五色氣己卯復置檢法官庚辰以范祖

禹劉安世在元祐中構造誣謗祖禹責授昭州別駕賀
州安置安世新州別駕英州安置九月己亥邈川首領
阿里骨卒己酉滁沂二州地震壬子楚王顥薨乙卯廢
皇后孟氏為華陽教主王清妙靜仙師賜名沖真冬十
月丁巳朔以楚王薨罷文德殿視朝壬戌夏人寇廊延
陷金明砦戊辰詔被邊諸路相度城砦要害增嚴守備
辛未西南方雷聲雨雹癸酉鍾傳言築汝遮詔以為安
西城十一月丁未章惇上神宗實錄庚戌宴修實錄官

十二月辛酉宗景坐以立妾罔上罷開府儀同三司判
大宗正司事癸酉置施州鑄錢廣積監甲戌蔡京上新
修大學敕令式詳定重修敕令遺棄饑貧小兒三歲以
下聽收養為真子孫是歲于闐大食龜茲師王國西南
蕃龍氏羅氏入貢宗室子授官者四十六人

四年春正月丙戌朔不受朝羣臣及遼使詣東上閣門
拜表賀班內外學制庚寅以阿里骨子瞎征襲河西軍
節度使邈川首領甲午涇原路鈐轄王文振敗夏人于

沒煙峽庚戌李清臣罷二月己未以三省言追貶呂公著為建武軍節度副使司馬光為清遠軍節度副使王巖叟為雷州別駕奪趙瞻傳堯俞贈諡追韓維到任及孫固范百祿胡宗愈遺表恩詔江淮巡檢依舊法招置土兵癸亥于闐來貢黑汗王攻夏人三州遣其子以聞丙寅夏人寇綏德城庚午詔國信使毋得以非例之物遣人使仍著條禁癸酉詔申王似端王佖歲賜錢各六千五百緡丙子進神宗婉儀宋氏為賢妃己卯復元豐

權茶法庚辰罷春秋科癸未以三省言追貶呂大防為
舒州團練使劉摯為鼎州團練副使蘇轍為化州別駕
梁燾為雷州別駕范純仁為安武軍節度副使安置于
循新雷化永五州劉奉世為光祿少卿分司南京黜韓
維以下三十人輕重有差甲申降文彥博為太子少保
閏月丙戌朔張天說坐上書詆訕先朝處死壬寅以曾
布知樞密院事許將為中書侍郎蔡卞為尚書左丞吏
部尚書黃履為尚書右丞翰林學士林希同知樞密院

事癸卯大雨電甲辰蘇軾責授瓊州別駕移昌化軍安
置范祖禹移賓州安置劉安世移高州安置己酉御集
英殿策進士庚戌策武舉三月壬戌夏人犯麟州神堂
堡出兵討之及進築胡山砦癸亥賜禮部奏名進士諸
科及第出身六百九人甲子詔武舉謝師古等以遠人
賜帛李惟岳以高年賜帛丁卯詔瀘南安撫司南平軍
毋擅誘楊光榮獻納播州疆土庚午夏人大至葭蘆城
下知石州張構等擊走之甲戌韋金明池丙子尅胡山

新砦成賜名平羗砦辛巳西上閣門使折克行破夏人于長波川斬首二千餘級獲牛馬倍之壬午命官編類司馬光等改廢法度論奏事狀夏四月丁亥命諸獄置氣樓涼窻設漿飲薦席杻械五日一浣繫囚以時沐浴遇寒給薪炭甲午熙河築金城關丙申詔發解省試添策一道丁酉進編臣僚章疏一百四十三帙己亥呂大防卒于虔州庚子知保安軍李沂伐夏國破洪州壬寅環慶鈐轄張存入鹽州俘戮甚衆及還夏人追襲之復

多亡失甲辰置克戎砦平夏城置靈平砦丁丑以西邊
板築有勞曲赦陝西河東路追貶王珪為萬安軍司戶
參軍己酉復文德殿侍從轉對五月丁巳文彥博薨辛
酉以皇太妃服藥及亢旱決四京囚壬戌詔陝西添置
蕃落馬軍十指揮丁卯廢衛州淇水第二馬監潁昌府
單鎮馬監辛未韓鎮薨丁丑貶韓維為崇信軍節度副
使六月癸未朔日有食之丁亥太白犯太微垣戊子宗
楚薨丙申詔翰林學士吏部尚書各舉監察御史二人

丁酉環慶路安疆砦成詔防托蕃漢官賜帛有差甲辰
熙河進築青石峽畢工賜名西平乙巳保寧軍觀察留
後宗漢為開府儀同三司徙封安康郡王己酉太原地
震太白晝見秋七月壬子朔太白晝見八月乙酉封湖
州觀察使世開為安定郡王丙戌鄜延將王慤復宥州
戊戌封宗祐為嗣濮王築威戎城己酉彗出西方九月
壬子以星變避殿減膳罷秋宴詔公卿悉心修政以輔
不逮求中外直言乙卯赦天下出元豐庫緡錢四百萬

付陝西廣糴詔歸明人未給田者舍以官舍戊辰彗滅
癸酉謁中太一宮為民祈福丙子御殿復膳命宗景為
開府儀同三司己卯封婉儀劉氏為賢妃冬十月戊戌
宗景薨壬寅廢安國安陽淇水監及洛陽原武監十一
月丁卯詔諫議大夫以上各舉監察御史一人癸酉貶
劉奉世為隰州團練副使柳州安置丁丑詔放歸田里
程頤涪州編管十二月癸未劉摯卒申申曲宴遼使于
垂拱殿乙酉侍御史董敦逸坐奏對不實貶秩知興國

軍是歲兩浙旱饑詔行荒政移粟賑貸出宮女二十四人宣城民妻一產四男子于闐西南蕃羅氏入貢播州夷楊光榮等內附戶部主戶一千三百六萬八千七百四十一丁三千三十四萬四千二百七十四客戶六百三十六萬六千八百二十九丁三百六萬七千三百三十二大辟三千一百九十二人

元符元年春正月庚戌朔不視朝丙寅咸陽民段義得玉印一紐甲戌韋瑞聖園觀北郊齋宮二月丙戌白虹

貫日庚寅詔建五王外第壬辰復罷翰林侍讀侍講學
士丁酉宗祐薨戊申知蘭州王舜臣討夏人于塞外築
興平城三月壬子令三省樞密吏三歲一試刑法甲寅
開楚州通漣河丙辰米脂砦成丁巳五王外第成賜名
懿親宅戊午封宗漢為嗣濮王殺朱崖流人陳衍壬戌
申王佖端王佖並為司空令太常寺與閤門修定刈麥
儀乙丑詔翰林學士承旨蔡京等辯驗段義所獻玉璽
定議以聞戊辰吏部郎中方澤等坐私謁后族宴聚罰

金補外庚午幸申王府辛未幸端王府甲戌進封咸寧
郡王俱為莘王普寧郡王似為簡王祁國公偲為永寧
郡王丙子築熙河通會關夏四月庚辰世開薨甲申幸
睿成宮及莘王簡王府丙戌章惇等進神宗帝紀梁燾
卒于化州壬辰林希罷丙申建顯謨閣藏神宗御集庚
子幸睿成宮壬寅學士院上寶璽靈光翔鶴樂章癸卯
詔學官增習兩經丁未曾布上刪修軍馬敕例五月戊
申朔御大慶殿受天授傳國受命寶行朝會禮己酉班

德音于天下減囚罪一等徒以下釋之癸丑受寶恭謝

景靈宮戊午宴紫宸殿庚申詔獻寶人段義為右班殿
直賜絹二百匹六月戊寅朔改元丙戌遣官分詣廊延
涇原河東熙河按驗所築城砦甲午蔡京等上常平免
役敕令秋七月乙卯詔增置大府丞一員乙丑敕大禮
五使自今並差執政官定為令丁卯令學官試三經庚
午詔范祖禹移化州安置劉安世梅州安置王巖叟朱
光庭諸子並勒停不敘壬申京師地震八月丙子朔熙

河蘭岷路復為熙河蘭會路庚辰詔自今三省樞密院
進擬在京文臣開封推判官武臣橫班使副及諸路監
司帥守並取旨召對丁亥詔侍從中書舍人以上各舉
所知二人權侍郎以上舉一人仍指言所堪職任九月
丁未以霖雨罷秋宴庚戌秦觀除名移雷州編管癸亥
賜王安石第于京師冬十月乙未詔武官試換文資丁
酉以河北京東河湓遣官振恤己亥夏人寇平夏城癸
卯駙馬都尉張敦禮坐元祐初上疏譽司馬光奪留後

授環衛官十一月壬戌朝獻景靈宮癸亥朝饗太廟甲子祀昊天上帝于圜丘赦天下是歲澶州河溢振恤河北京東被水者真定府忻州野蠶成繭涇原路禽夏國統軍鬼名阿埋等高麗賸征西南蕃張氏羅氏程氏入貢西蕃首領李訛啜巴訕支呂承信等內附

二年春正月甲辰朔御大慶殿以雪罷朝羣臣及遼使詣東上閣門拜表賀羣臣又詣內東門賀如儀丁卯出內金帛二百萬備陝西邊儲二月甲戌朔令監司舉本

路學行優異者各二人韋蕃入貢己卯詔許高麗國王

遣士賓貢辛巳增置神臂弓詔自今應被旨舉官所舉

不當具舉主姓名以聞甲申夏人以國母卒遣使告哀

且謝罪却其使不納戊子廊延鈴轄劉安敗夏人于神

堆甲午大食入貢乙未詔吏部守令課績從御史臺考

察黜其不實者三月丙辰遼人遣簽書樞密院事蕭德

崇來為夏人請緩師仍獻玉帶築環慶路定邊城丁巳

秦鳳經畧司言吳名革率部族孳畜歸順詔名革補內

殿承制首領李啍補右侍禁及賜錢帛有差庚申知府
州折克行獲夏國鈐轄令王皆保乙丑祈雨己巳莘王
俱為司空夏四月庚辰幸莘王府令廣西提點刑獄司
兼領鹽事丙戌築廊延河東路暖泉烏龍砦丁亥以旱
減四京囚罪一等杖以下釋之辛卯詔鞠獄徒以上須
結案及審錄審奏然後斷遣不如令者坐之癸巳封永
嘉郡王偲為睦王遣中書舍人郭知章報聘于遼丁酉
築威羌城五月甲辰太白晝見庚戌築廊延路金湯城

癸亥奉遷真宗神御于萬壽觀延聖殿曲赦陝西河東
路減囚罪一等流以下釋之建西安州及天都等砦乙
丑進章惇官五等曾布三等許將蔡卞黃履皆二等辛
未詔莘王俱睦王偁母進封婕妤六月庚辰賜蘭會州
新砦名會川城甲午賜環慶路之字平曰清平關戊戌
築定邊白豹城訖工閤門使張存等轉官賜金帛有差
秋七月乙巳盛暑中外決繫囚丁未放在京工役庚戌
河北河漲沒民田廬遣官振之甲子知環州种朴獲夏

國監軍訛勃囉丙寅洮西安撫使王瞻復邈川城西蕃
首領欽彪阿成以城降八月癸酉章惇等進新修敕令
式傳讀於帝前其間有元豐所無而用元祐敕令修立
者帝曰元祐亦有可取乎惇等對曰取其善者甲戌太
原地震戊寅皇太子生辛巳降德音于諸路減囚罪一
等流以下釋之乙酉賜熙河路緡錢百萬撫納部族丁
亥復修會州癸巳太白晝見晤征降甲午建葭蘆成為
晉寧軍丙申保寧軍節度呂惠卿特授檢校司空九月

庚子朔夏人來謝罪癸卯命御史點檢三省樞密院並
依元豐舊制甲辰幸儲祥宮乙巳幸醴泉觀丁未立賢
妃劉氏為皇后己未青唐酋隴拶以城降壬戌雨罷秋
宴甲子右正言鄒浩論劉氏不當立特除名勒停新州
羈管丙寅御文德殿冊皇后閏月癸酉置律學博士貢
詔詳議廟制以青唐為鄯州隴右節度邈川為湟州宗
哥城為龍支城俱隸隴右戊寅以廓州為寧砦城丙戌
果州團練使仲忽進古方鼎誌曰魯公作文王尊彝甲

午熒惑犯太微垣左執載越王越王茂薨冬十月壬子
詔河北大名二十二州軍置馬步軍指揮以廣威保捷
為名甲寅日有食之既十一月丁亥詔綏德城為綏德
軍壬辰詔河北黃河退灘地聽民耕墾免租稅三年乙
未詔諸州置教授者依太學三舍法考選生徒升補是
月河中猗氏縣民妻一產四男子

三年春正月辛未帝有疾不視朝丁丑奉安太宗皇帝
御容于景靈宮大定殿戊寅大赦天下蠲民租己卯帝

崩皇太后諭遺制立弟端王即位于柩前皇太后權同處分軍國事四月己未上諡曰欽文睿武昭孝皇帝廟號曰哲宗七月丁卯以諡號冊寶奏告天地宗廟社稷八月壬寅葬于永泰陵癸亥祔太廟崇寧三年七月加諡曰憲元繼道世德揚功欽文睿武齊聖昭孝皇帝政和三年改諡憲元繼道顯德定功欽文睿武齊聖昭孝皇帝

贊曰哲宗以冲幼踐阼宣仁同政初年召用馬呂諸賢

罷青苗復常平登俊良闢言路天下人心翕然向治而
元祐之政庶幾仁宗奈何熙豐舊姦拊去未盡已而媒
孽復用卒假紹述之言務反前政報復善良馴致黨籍
禍興君子盡斥而宋政益敝矣吁可惜哉

宋史卷十八

欽定四庫全書薈要卷五千六百四十七

史部

宋史卷十九

元中書右丞相總裁托克托等修

本紀第十九

徽宗一

徽宗體神合道駿烈遜功聖文仁德憲慈顯孝皇帝諱
佖神宗第十一子也母曰欽慈皇后陳氏元豐五年十
月丁巳生於宮中明年正月賜名十月授鎮寧軍節度

使封寧國公哲宗即位封遂寧郡王紹聖三年以平江鎮江軍節度使封端王出就傳五年加司空改昭德彰信軍節度元符三年正月己卯哲宗崩皇太后垂簾哭謂宰臣曰家國不幸大行皇帝無子天下事須早定章惇厲聲對曰在禮律當立母弟簡王皇太后曰神宗諸子申王長而有目疾次則端王當立惇又曰以年則申王長以禮律則同母之弟簡王當立皇太后曰皆神宗子莫難如此分別於次端王當立知樞密院曾布曰章

惇未嘗與臣等商議如皇太后聖諭極當尚書左丞蔡卞中書門下侍郎許將相繼曰合依聖旨皇太后又曰先帝嘗言端王有福壽且仁孝不同諸王於是惇為之默然乃召端王入即皇帝位皇太后權同處分軍國事庚辰赦天下常赦所不原者百官進秩一等賞諸軍遣宋淵告哀于遼辛巳尊先帝后為元符皇后癸未追尊母貴儀陳氏為皇太妃甲申命章惇為山陵使乙酉出先帝遺留物賜近臣丙戌以申王佖為太傅進封陳王

賜贊拜不名丁亥進仁宗淑妃周氏神宗淑妃邢氏並
為貴妃賢妃宋氏為德妃戊子以章惇為特進封申國
公己丑進封莘王俱為衛王守太保簡王似為蔡王睦
王偲為定王並守司徒罷增八廂邏卒二月己亥始聽
政尊先帝妃朱氏為聖瑞皇太妃壬寅以南平王李乾
德為檢校太師丁未立順國夫人王氏為皇后庚戌向
宗回宗良遷節度使太后弟姪未任者俱授以官癸未
初御紫宸殿庚申以吏部尚書韓忠彥為門下侍郎資

政殿大學士黃履為尚書右丞辛酉名懿親宅潛邸曰
龍德宮甲子毀承極殿丙寅遣吳安憲朱孝孫以遺留
物遺遼國主三月戊辰朔詔宰臣執政侍從官各舉可
任臺諫者庚午遣韓治曹譜告即位于遼辛未詔追封
祖宗諸子光濟等三十三人為王女四十八人為公主
甲申以西蕃王隴拶為河西軍節度使尋賜姓名曰趙
懷德邈川首領瞎征為懷遠軍節度使己丑以日當食
降德音于四京減囚罪一等流以下釋之庚寅錄趙普

後辛卯詔求直言癸巳以寧遠軍節度觀察留後世雄
為崇信軍節度使封安定郡王乙未却永興民王懷所
進玉器夏四月丁酉朔日有食之己亥令監司分部決
獄甲辰以韓忠彥為尚書右僕射兼中書侍郎禮部尚
書李清臣為門下侍郎翰林學士蔣之奇同知樞密院
事乙巳錄曹佾後丁未以帝生日為天寧節己酉長子
亶生辛亥大赦天下應元符二年己前係官逋負悉蠲
之癸丑鹿敏求等以應詔上書遷秩乙卯請大行皇帝

謚于南郊丁巳詔范純仁等復官宮觀蘇軾等徙內郡
居住癸亥罷編類臣僚章疏局乙丑賜禮部奏名進士
及第出身五百十八人五月丁卯朔罷理官失出之罰
丙子詔復廢后孟氏為元祐皇后乙酉蔡卞罷己丑詔
追復文彥博王珪司馬光呂公著呂大防劉摯等三十
三人官辛卯還司馬光等致仕遺表恩癸巳河北河東
陝西饑詔帥臣計度振恤六月丙申朔遼主遣蕭進忠
蕭安世等來弔祭秋七月丙寅朔奉皇太后詔罷同聽

政丁卯告哲宗欽文睿武昭孝皇帝諡于天地宗廟社稷戊辰上寶冊于福寧殿癸酉皇太后還政減天下囚罪一等流以下釋之癸未遣陸佃李嗣徽報謝于遼罷管勾陝西京川路坑冶及江西廣東湖北夔梓成都路管勾措置鹽事官辛卯封子亶為韓國公八月戊戌詔諸路遇民有疾委官監醫往視疾給藥庚子作景靈西宮奉安神宗神御建哲宗神御殿於其西辛丑出內庫金帛二百萬糴陝西軍儲壬寅葬哲宗皇帝于永泰陵

丙午遣董敦逸賀遼主生辰呂仲甫賀正旦戊申高麗
王王熙遣使奉表來慰庚戌詔以仁宗神宗廟永世不
祧戊午以蔡王似為太保癸亥祔哲宗神主于太廟樂
曰大成之舞九月甲子詔修哲宗實錄丙寅遼遣蕭穆
來賀即位丁卯減兩京河陽鄭州囚罪一等民緣山陵
役者蠲其賦己巳幸龍德宮辛未章惇罷丙子以陳王
似為太尉丁丑詔修神宗史己丑復均給職田十月乙
未夏國入貢丙申蔡京出知永興軍貶章惇為武昌軍

節度副使丁酉以韓忠彥為尚書左僕射兼門下侍郎
壬寅以曾布為尚書右僕射兼中書侍郎乙卯升端州
為興慶軍己未詔禁曲學偏見妄意改作以害國事者
辛酉罷平準務十一月丁卯詔修六朝寶訓降德音于
端州減囚罪一等徒以下釋之庚午詔改明年元戊寅
以觀文殿學士安燾知樞密院事庚辰黃履罷己丑置
春秋博士辛卯令陝西兼行銅鐵錢以禮部尚書范純
禮為尚書左丞十二月甲午以皇太后不豫禱于宮觀

祠廟嶽瀆戊戌出廩粟減價以濟民辛丑慮囚甲辰詔
修國朝會要戊申降德音于諸路減囚罪一等流以下
釋之戊午遼人來賀正旦是歲出宮女六十九人

建中靖國元年春正月壬戌朔有赤氣起東北亘西南
中函白氣將散復有黑祲在旁癸亥有星自西南入尾
其光燭地癸酉范純仁薨甲戌皇太后崩遺詔追尊皇
太妃陳氏為皇太后丁丑易大行皇太后園陵為山陵
命曾布為山陵使己卯令河陝募人入粟免試注官二

月丙申雨電己亥汰秦鳳路二兵甲辰始聽政乙巳出
內庫及諸路常平錢各百萬備河北邊儲丁巳貶章惇
為雷州司戶參軍三月甲子始御紫宸殿乙丑遼使蕭
恭來告其主洪基殂遣謝文瓘上官均等往弔祭黃寔
賀其子延禧立丁丑詔以河西軍節度使趙懷德知湟
州壬午以日當食避殿減膳降天下囚罪一等流以下
釋之夏四月辛卯朔日食不見甲午上大行皇太后諡
曰欽聖憲肅乙未上追尊皇太后諡曰欽慈丁酉御殿

復膳壬寅詔諸路疑獄當奏而不奏者科罪不當奏而輒奏者勿坐著為令五月辛酉朔大雨雹詔三省減吏貲節冗費丙寅葬欽聖憲肅皇后欽慈皇后于永裕陵庚辰蘇頌薨丙戌祔欽聖憲肅皇后欽慈皇后神主于太廟戊子減兩京河陽鄭州囚罪一等民緣山陵役者蠲其賦六月庚寅朔以韓國公亶為開府儀同三司封京兆郡王戊申封向宗回為永陽郡王向宗良為永嘉郡王甲寅封吳王顥子孝騫為廣陵郡王顥子孝參為

信都郡王戊午范純禮罷己未詔班鬪殺情理輕重格
秋七月辛巳內郡置添差宗室闕丙戌安燾罷丁亥以
蔣之奇知樞密院事吏部尚書陸佃為尚書右丞端明
殿學士章綏同知樞密院事九月己巳詔諸路轉運提
舉司及諸州軍有遺利可以講求及冗員浮費當裁損
者詳議以聞丙戌予禋薨冬十月乙未李清臣罷丁酉
天寧節羣臣及遼使初上壽于垂拱殿十一月庚申以
陸佃為尚書左丞吏部尚書溫益為尚書右丞壬戌以

西蕃賒羅撒為西平軍節度使邈川首領辛未出御製
南郊親祀樂章戊寅朝獻景靈宮己卯饗太廟庚辰祀
天地于圜丘赦天下改彰信軍為興仁軍昭德軍為隆
德軍改明年元十二月壬辰賜陳王佖詔書不名癸卯
進神宗昭儀武氏為賢妃丙午奉安神宗神御于景靈
西宮大明殿丁未詣宮行禮己酉降德音于西京減囚
罪一等徒以下釋之是歲遼人來獻遺留物河東地震
京畿蝗江淮兩浙湖南福建旱

宗寧元年春正月丁丑太原等十一郡地震詔死者家
賜錢有差二月丙戌朔以聖瑞皇太妃疾慮囚甲午子
亶改名烜以蔡確配饗哲宗廟庭戊戌詔士有懷抱道
德久沈下僚及學行兼備可勵風俗者待制以上各舉
所知二人奉議郎趙諗謀反伏誅庚子封子煥為魏國
公辛丑聖瑞皇太妃薨追尊為皇太后庚戌追封孔鯉
為泗水侯孔伋為沂水侯三月丁巳奉安哲宗神御于
景靈西宮寶慶殿戊午詣宮行禮壬戌以定王惲為太

保壬申幸定王第夏四月己亥上皇太后諡曰欽成五月丁巳熒惑入斗庚申韓忠彥罷己巳瞎征卒庚午降復太子太保司馬光為正議大夫太保文彥博為太子太保餘各以差奪官辛未詔待制以上舉能吏各二人乙亥黜後苑內侍請以箔金飾宮殿者丙子詔元祐諸臣各以削秩自今無所復問言者亦勿輒言戊寅葬欽成皇后于永裕陵己卯陸佃罷庚辰以許將為門下侍郎溫益為中書侍郎翰林學士承旨蔡京為尚書左丞

吏部尚書趙挺之為尚書右丞六月己丑祔欽成皇后
神主于太廟壬辰減西京河陽鄭州囚罪一等民緣山
陵役者蠲其賦癸卯詔六曹尚書有事奏陳許獨負上
殿己酉太白晝見壬子改渝州為恭州癸丑詔倣唐六
典修神宗所定官制封伯夷為清惠侯叔齊為仁惠侯
閏月甲寅朔更名哲宗神御殿曰重光辛酉慮囚壬戌
曾布罷甲子詔諸路州縣官有治績最著者許監司帥
臣各舉一人壬午追貶李清臣為武安軍節度副使癸

未詔監司帥臣於本路小使臣以上及親民官內有智
謀勇果可備將帥者各舉一人秋七月甲申朔建長生
宮以祠熒惑丙戌詔省臺寺監及監司郡守並以三年
成任戊子以蔡京為尚書右僕射兼中書侍郎己丑焚
元祐法甲午詔於都省置講議司詔杭州明州置市舶
司庚子章綵罷甲辰以雨水壞民廬舍詔開封府振恤
壓溺者辛亥罷春秋博士八月乙卯子烜改名桓煥改
名楷乙丑罷權侍郎官辛未置安濟坊養民之貧病者

仍令諸郡縣並置甲戌詔天下興學貢士建外學于國
南丙子詔司馬光等二十一人子弟毋得官京師己卯
以趙挺之為尚書左丞翰林學士張商英為尚書右丞
九月戊子京師置居養院以處鰥寡孤獨仍以戶絕財
產給養乙未詔中書籍元符三年臣僚章疏姓名為正
上正中正下三等邪上邪中邪下三等丁酉治臣僚議
復元祐皇后及謀廢元符皇后者罪降韓忠彥曾布官
追貶李清臣為雷州司戶參軍黃履為祁州團練副使

竄曾肇以下十七人已亥籍元祐及元符末宰相文彥博等侍從蘇軾等餘官秦觀等內臣張士良等武臣王獻可等凡百有二十人御書刻石端禮門庚子以元符末上書人鍾世美以下四十一人為正等悉加旌擢范柔中以下五百餘人為邪等降責有差時世美已卒詔贈官仍官其子一人壬寅貶曾布為武泰軍節度使甲辰詔元符三年建中靖國元年責降臣僚已經牽復者其元責告命並繳納尚書省冬十月癸亥蔣之奇罷戊

辰詔責降宮觀人不得同一州居住甲戌以御史錢適
石豫左膚及輔臣蔡京許將溫益趙挺之張商英等言
罷元祐皇后之號復居瑤華宮丙子劉奉世等二十七
人坐元符末黨與變法並罷祠祿戊寅以資政殿學士
蔡卞知樞密院事十一月乙酉邵州言知溪洞徽州楊
光銜內附戊子以婉儀鄭氏為賢妃辛卯置河北安濟
坊癸巳置西南兩京宗正司及敦宗院戊戌置顯謨閣
學士待制官戊申子楷為開府儀同三司封高密郡王

己酉立卿監郎官三歲黜陟法十二月癸丑論棄湟州
罪貶韓忠彥為崇信軍節度副使曾布為賀州別駕安
燾為寧國軍節度副使范純禮分司南京庚申鑄當五
錢辛酉贈哲宗子鄧王茂為皇太子諡獻愍丁丑詔諸
邪說詖行非先聖賢之書及元祐學術政事並勿施用
是歲京畿京東河北淮南蝗江浙熙河漳泉潭衡郴州
興化軍旱辰沅州徭入寇出宮女七十六人

二年春正月辛巳朔乙酉竄任伯雨陳瓘龔夬鄒浩于

嶺南馬涓等九人分貶諸州知荆南舒亶平辰沅州獠
賊復誠徽州改誠州為靖州徽州為蒔竹縣壬辰溫益
卒乙巳以復荆湖疆土曲赦兩路丙午以沍寒令監司
分部決獄丁未以蔡京為尚書左僕射兼門下侍郎二
月辛亥安化蠻入寇廣西經畧使程節敗之壬子遣官
相度湖南北獠地取其材植入供在京營造甲寅進元
符皇后為太后宫名崇恩辛酉置殿中監癸酉奉安哲
宗御容于西京會聖宮及應天院丙子置諸路茶場三

月壬午進仁宗充儀張氏為賢妃乙酉減西京囚罪一
等詔黨人子弟毋得擅到闕下其應緣趨附黨人罷任
在外指射差遣及得罪停替臣僚亦如之丁亥御集英
殿策進士癸卯賜禮部奏名進士及第出身五百三十
八人其嘗上書在正等者升甲邪等者黜之夏四月甲
寅詔侍從官各舉所知二人乙卯于闐入貢丁卯詔毀
呂公著司馬光呂大防范純仁劉摯范百祿梁燾王巖
叟景靈西京繪像已巳以初謁景靈宮赦天下乙亥詔

毀刊行唐鑑并三蘇秦黃等文集戊寅以趙挺之為中書侍郎張商英為尚書左丞戶部尚書吳居厚為尚書右丞兵部尚書安惇同知樞密院事奪王珪贈諡追毀程頤出身文字其所著書令監司覺察五月辛巳以賢妃鄭氏為淑妃癸巳以陳王佖為太師丙戌貶曾布為廉州司戶參軍己亥封子楫為楚國公丙午冊元符皇后劉氏為太后六月壬子冊王氏為皇后庚申詔元符末上書進士類多詆訕令州郡遣入新學依大學自訟

齋法候及一年能革心自新者許將來應舉其不變者
當屏之遠方壬戌慮囚是月中太一宮火復湟州秋七
月己卯學士院火辛巳以復湟州進蔡京官三等蔡卞
以下二等壬午白虹貫日甲申降德音于熙河蘭會路
減囚罪一等流以下釋之庚寅曾肇責授濮州團練副
使辛卯詔上書進士見充三舍生者罷歸丁酉詔自今
戚里宗屬勿復為執政官著為令乙巳詔責降人子弟
毋得任在京及府界差遣八月丁未朔再論棄湟州罪

貶韓忠彥為磁州團練副使安燾為祁州團練副使范
純禮為靜江軍節度副使削蔣之奇秩三等戊申張商
英罷辛酉詔張商英入元祐黨籍九月辛巳詔宗室不
得與元祐姦黨子孫為婚姻庚寅封子樞為吳國公詔
上書邪等人知縣以上資序並與外祠選人不得改官
及為縣令壬辰置醫學癸巳令天下郡皆建崇寧寺辛
丑改吏部選人自承直郎至將仕郎七階令天下監司
長吏廳各立元祐姦黨碑甲辰詔郡縣謹祀社稷冬十

一月庚辰以元祐學術政事聚徒傳授者委監司舉察必罰無赦十二月癸亥祧宣祖皇帝昭憲皇后丙寅詔六曹長貳歲考郎官治狀分三等以聞是歲諸路蝗纂府蠻楊晟銅融州楊晟天邵州黃聰內附

三年春正月己卯安化蠻降辛巳詔上書邪等人毋得至京師戊子鑄當十大錢壬辰增縣學弟子貳甲午賜蔡京子攸進士出身癸卯太白晝見甲辰鑄九鼎二月丙午以淑妃鄭氏為貴妃以刊定元豐役法不當黜錢

通以下九人丁未置漏澤園己酉詔王珪章惇別為一籍如元祐黨詔自今御後殿許起居郎舍人侍立壬子以楚國公楫為開府儀同三司封南陽郡王庚申令天下坑冶金銀復盡輸內藏辛未雨雹三月辛巳置文繡院丁亥作園土以居強盜貸死者甲午躋欽成皇后神主於欽慈皇后之上辛丑大內災夏四月乙巳以火災降德音于四京減囚罪一等流以下原之乙卯復鄴州建為隴右都護府辛酉徙封楫為樂安郡王復廓州乙

丑罷講議司己巳曲赦陝西壬申楫薨五月戊寅罷開
封權知府置牧尹少尹改定六曹以吏戶儀兵刑工為
序增其負數倣唐六典易胥吏之稱己卯以復鄯廓蔡
京為守司空封嘉國公庚辰許將趙挺之吳居厚安惇
蔡卞各轉三官甲申改鄯州為西寧州仍為隴右節度
辛丑詔黜守臣進金助修宮庭者六月壬寅朔圖熙寧
元豐功臣於顯謨閣癸酉以王安石配饗孔子廟丙午
增諸州學未立者壬子置書畫算學占城入貢戊午詔

重定元祐元符黨人及上書邪等者合為一籍通三百
九人刻石朝堂餘並出籍自今毋得復彈奏辛酉復置
太醫局癸亥慮囚乙丑詔內外官毋得越職論事僥倖
奔競違者御史臺彈奏七月癸酉以婉儀王氏為德妃
庚辰詔自今大禮不受尊號羣臣毋上表辛卯行方田
法八月庚子詔諸路知州通判增入主管學事四字壬
寅大雨壞民廬舍令收瘞死者甲辰蔡京上神宗史丙
午許將罷九月乙亥以趙挺之為門下侍郎吳居厚為

中書侍郎翰林學士承旨張康國為尚書左丞刑部尚書鄧洵武為尚書右丞壬辰詔諸路州學別置齋舍以養材武之士冬十月辛丑朔大雨雹丁未賢妃張氏薨丙辰命官編類六朝勲臣戊午夏人入涇原圍平夏城寇鎮戎軍庚申熙河蘭會路經畧安撫使王厚言河西軍節度使趙懷德等出降己巳立九廟復翼祖宣祖庚午貴妃邢氏薨十一月甲戌幸太學官論定之士十六人遂幸辟雍賜國子司業吳綱蔣靜四品服學官推恩

有差丙戌封子杞為冀國公丁亥詔取士並繇學校罷
發解及省試法科場如故事癸巳更上神宗諡曰體元
顯道帝德王功英文烈武欽仁聖孝皇帝加上哲宗諡
曰憲元繼道顯德定功欽文睿武齊聖昭孝皇帝甲午
朝獻景靈宮乙未饗太廟丙申祀昊天上帝于圜丘赦
天下升興仁隆德軍為府還彰信昭德舊節十二月乙
巳升通遠軍為鞏州戊午賜陳王佖入朝不趨是歲諸
路蝗出宮女六十二人廣西黎洞楊晟免等內附

宋史卷十九

欽定四庫全書薈要卷五千六百四十八

史部

宋史卷二十

元中書右丞相總裁托克托等修

本紀第二十

徽宗二

四年春正月庚午朔改熙河蘭會路為熙河蘭湟路丙戌築溪哥城壬辰詔察諸路監司貪虐者論其罪丙申詔京畿路改置轉運使提點刑獄官蔡卞罷立武學法

丁酉秦鳳蕃落獻邦潘疊三州以內侍童貫為熙河蘭
湟秦鳳路經畧安撫置制使二月乙巳築鄣謀城己酉
置親衛勲衛翊衛郎中郎等官以勲戚近臣之兄弟子
孫有官者試充甲寅以張康國知樞密院事兵部尚書
劉逵同知樞密院事吏部尚書何執中為尚書左丞乙
卯班方田法庚申詔西邊用兵法能招納羌人者與斬
級同賞壬戌升趙州為慶源軍甲子雨雹乙丑改三衛
郎為侍郎閏月壬申復元豐銓試斷按法令州縣倣尚

書六曹分六案甲申置陝西河東河北京西監鑄當二
夾錫鐵錢己丑御端門受趙懷德降授感德軍節度使
封安化郡王壬辰曲赦熙河蘭湟路三月壬寅置清海
馬監甲辰以趙挺之為尚書右僕射兼中書侍郎丙午
詔建古王砦為懷遠軍庚戌令呂惠卿致仕戊午復銀
州乙丑詔州縣屬鄉聚徒教授者非經書子史毋習丁
卯牂牁夜郎首領以地降是月夏人攻塞門砦夏四月
辛未遼遣蕭良來為夏人求還侵地及退兵戊寅夏人

攻臨宗砦辛巳詔諸路走馬承受毋得預軍政及邊事
己丑夏人寇順寧砦廊延第二副將劉延慶擊破之復
攻湟州北蕃市城知州辛叔獻等擊却之五月戊申除
黨人父兄子弟之禁壬子遣林攄報聘于遼賜張繼先
號虛靜先生癸丑罷轉運司檢察鈎考法辛酉命官分
部決獄六月丙子復解池鹽占城入貢丁丑慮囚辛巳
罷陝西河東力役甲申曲赦熙河陝西河東京西路戊
子趙挺之罷秋七月丙申朔罷三京國子監官各置司

業一負辛丑置熒惑壇置四輔郡以潁昌府為南輔襄
邑縣為東輔鄭州為西輔澶州為北輔甲寅詔奪元祐
輔臣墳寺丁巳還上書流人戶部尚書曾孝廣坐錢帛
皆闕出知杭州八月戊辰以德妃王氏為淑妃庚午以
王江古州歸順置提舉溪洞官二負改懷遠軍為平州
丙子以東輔為拱州甲申奠九鼎于九成宮乙酉詣宮
酌獻辛卯賜新樂名大晟置府建官壬辰遣劉正夫使
遼九月己亥赦天下乙巳詔元祐人貶謫者以次徙近

地惟不得至畿輔詔京畿三路保甲並於農隙時教閱
乙卯賜上舍生三十五人及第丙辰詔自今非宰臣毋
得除特進冬十月自七月雨至是月不止甲申以左右
司所編紹聖元符以來申明斷例班天下刑名例班刑
部大理司丁亥升武岡縣為軍戊子詔上書進士未獲
者限百日自陳免罪壬辰日中有黑子十一月戊戌安
定郡王世雍薨丙辰置諸路提舉學事官己未章惇卒
十二月癸酉升拱州為保慶軍甲申分平州置允州格

州是歲蘇湖秀三州水賜乏食者粟泰州禾生穰

五年春正月戊戌彗出西方其長竟天庚子復置江湖
淮浙常平都倉甲辰以吳居厚為門下侍郎劉逵為中
書侍郎乙巳以星變避殿損膳詔求直言闕失毀元祐
黨人碑復謫者仕籍自今言者勿復彈糾丁未太白晝
見赦天下除黨人一切之禁權罷方田戊申詔侍從官
奏封事已酉罷諸州歲貢供奉物庚戌詔崇寧以來左
降者各以存歿稍復其官盡還諸徙者辛亥御殿復膳

壬子罷園土法丁巳罷書畫筭醫四學壬戌復書畫筭
學二月甲子朔詔監司條奏民間疾苦丙寅蔡京罷為
開府儀同三司中太一宮使以觀文殿大學士趙挺之
為特進尚書右僕射兼中書侍郎庚午詔翰林學士兩
省官及館閣自今並除進士出身人壬申省内外冗官
罷醫官兼宮觀者蒲甘國入貢丁丑以前後所降御筆
手詔模印成冊班之中外州縣不遵奉者監司按劾監
司推行不盡者諸司互察之三月丙申詔星變已消罷

求直言辛丑改威德軍為石堡砦封眉州防禦使世福
為安定郡王癸卯御集英殿策進士丁未罷諸州武學
乙卯廢銀州為銀川城丙辰蔡王似薨己未賜禮部奏
名進士及第出身六百七十一人夏四月丁丑停免兩
浙水災州郡夏稅五月丁未班紀元歷辛亥封子昝為
魯國公乙卯罷辟舉盡復元豐選法六月癸亥立諸路
監司互察法庇匿不舉者罪之仍令御史臺糾劾改格
州為從州甲子詔求隱逸之士令監司審覈保奏其緣

私者御史察之丁卯詔輔臣條具東南守備策壬申慮
囚秋七月庚寅朔日當食不虧壬寅詔改明年元九月
辛丑河南府嘉禾與芝草同本生冬十月己卯升澶州
為開德府庚辰降德音于開德府減罪囚一等徒以下
釋之十一月辛卯陳王佖薨乙巳詔立武士貢法辛亥
併京畿提刑入轉運司十二月戊午朔日當食不虧羣
臣稱賀己未劉逵罷壬戌詔臣僚休日請對特御便殿
己巳詔監司按事有懷姦挾情不盡實者流竄不敘是

歲廣西黎洞韋晏鬧等內附

大觀元年春正月戊子朔赦天下甲午以蔡京為尚書
左僕射兼門下侍郎戊戌幸興德禪院復廢官庚子置
儀禮局於尚書省甘露降于帝鼎內羣臣稱賀壬寅吳
居厚罷戊申進封衛王俱為魏王定王偲為鄧王壬子
以何執中為中書侍郎鄧洵武為尚書左丞戶部尚書
梁子美為尚書右丞乙卯封仲損為南康郡王仲御為
汝南郡王二月壬戌以向宗回為開府儀同三司徙封

安康郡王甲子以黎洞納土曲赦廣西乙亥復醫學己卯復行方田丙戌以平昌郡君韋氏為才人三月丁酉趙挺之罷以何執中為門下侍郎鄧洵武為中書侍郎梁子美為尚書左丞吏部尚書朱諤為右丞甲辰立八行取士科癸丑趙挺之卒夏四月乙丑以淑妃王氏為貴妃五月己丑封子楫為楊國公朝散郎吳儲承議郎吳侔坐與妖人張懷素謀反伏誅貶呂惠卿為祁州團練副使庚寅鄧洵武罷甲午詔班新樂于天下癸卯詔

自今凡總一路及監司之任勿以元祐學術及異意人充選以安化蠻犯邊益兵赴廣西討之乙巳子構生六月己未以梁子美為中書侍郎壬戌詔景靈宮建僖祖殿室甲子以黎人地為庭孚二州癸酉賜上舍生二十九人及第乙亥朱諤卒丁丑慮囚甲申以才人韋氏為婕妤秋七月乙酉朔伊洛溢戊子詔括天下漏丁壬寅班祭服于州郡乙巳賢妃武氏薨八月乙卯曾布卒丁巳封子構為蜀國公庚申以戶部尚書徐處仁為尚書

右丞吏部尚書林攄同知樞密院事己巳降德音于淮
海吳楚二十六州減囚罪一等流以下釋之九月庚寅
建顯烈觀于陳橋己酉加上僖祖諡曰立道肇基積德
起功懿文憲武睿和至孝皇帝朝獻景靈宮庚戌饗太
廟辛亥饗明堂赦天下升永興軍為大都督府章綬坐
冒法竄海島李景直等四人以上書觀望罪並編管嶺
南冬十月己未詔士有才武絕倫者歲貢準文士上舍
上等法辛酉蘇州地震乙丑貶張商英為安化軍節度

副使己巳大雨雹閏月丙戌以林攄為尚書左丞資政

殿學士鄭居中同知樞密院事乙未詔守令以戶口為

殿最升桂州為大都督府鎮州為靖海軍節度壬申禁

用翡翠乙巳升太原府鄧州並為大都督府十一月壬

子朔日有食之蔡京等以不及所當食分率羣臣稱賀

乙丑置符寶郎己巳升瀛州為河間府瀛海軍節度戊

寅南丹州刺史莫公佺降徐處仁以母憂去位十二月

庚寅以蔡京為太尉進何執中以下官二等癸巳以江

寧荆南楊杭越洪福潭廣桂並為帥府置黔南路丁酉
置開封府府學己亥以婉容喬氏為賢妃開淇河是歲
秦鳳旱京東水河溢遣官振濟貸被水戶租廬州雨豆
汀懷二州慶雲見乾寧軍同州黃河清于闐夏國入貢
涪州夷駱世葉駱文貴內附

二年春正月壬子朔受八寶于大慶殿赦天下文武進
位一等蔡京表賀符瑞乙卯以婉儀劉氏為德妃己未
蔡京進太師加童貫節度使仍宣撫庚申進封魏王俱

為燕王鄧王偃為越王並為太尉京兆郡王桓為定王
高密郡王楷為嘉王並為司空吳國公樞為建安郡王
冀國公杞為文安郡王楚國公栩為安康郡王楊國公
械為濟陽郡王蜀國公構為廣平郡王並為開府儀同
三司甲子以神宗德妃宋氏劉氏為淑妃賢妃喬氏為
德妃庚午徙封仲損為齊安郡王仲御為華陽郡王孝
騫為晉康郡王孝參為豫章郡王並開府儀同三司封
仲增為信安郡王仲忽為普安郡王仲癸為咸安郡王

仲僕為同安郡王仲縻為淮安郡王戊寅徙封向宗回
為漢東郡王向宗良為開府儀同三司仲損薨河東北
盜起二月甲申置諸路曹掾官甲午詔建徽猷閣藏哲
宗御集置學士直學士待制官己亥以安德軍節度使
錢景臻為開府儀同三司庚戌以婕妤韋氏為修容三
月庚申班金籙靈寶道場儀範于天下甲子封子材為
魏國公乙亥封子模為鎮國公戊寅賜上舍生十三人
及第升乾寧軍為清州詔監司歲舉所部郡守二人縣

令四人赴三省審察夏四月甲辰復洮州五月庚戌朔
日有食之辛亥慮囚以復洮州功賜蔡京玉帶加童貫
檢校司空仍宣撫甲寅復諸路歲貢供奉物壬戌溪哥
王子臧征撲哥降復積石軍戊辰詔官蔡京子孫一人
進執政官一等六月乙酉以涪夷地為珍州甲午以平
夏城為懷德軍乙未以殿中六尚算學大官局翰林儀
鸞司皆隸六察秋七月庚戌罷建僖祖殿室乙卯以婉
容王氏為賢妃八月辛巳邢州河水溢壞民廬舍復被

水者家丙申中書侍郎梁子美罷知鄆州己亥置保州
敦宗院九月辛亥以林攄為中書侍郎吏部尚書余深
為尚書左丞壬戌貶向宗回為太子少保致仕壬申封
子植為吳國公癸酉皇后王氏崩削向宗回官爵丙子
曲赦熙河蘭湟秦鳳永興軍路冬十一月丁未朔太白
晝見乙丑上大行皇后諡曰靖和十二月壬寅陪葬靖
和皇后于永裕陵是歲同州黃河清出宮女七十有七
人于閬夏國入貢涪夷任應舉楊文貴湖南猺楊再光

內附

三年春正月乙卯祔靖和皇后神主于別廟己未減兩
京河陽鄭州囚罪一等民緣園陵役者蠲其賦丁卯以
涪夷地為承州甲戌升湟州為饗德軍節度二月丙子
朔播州楊文貴納土以其地置遵義軍丁丑韓忠彥致
仕三月丙午立海商越界法庚戌御集英殿策進士辛
酉詔四川郡守並選內地人任之壬戌併黔南入廣西
路乙丑賜禮部奏名進士及第出身六百八十五人壬

申張康國卒夏四月戊寅林攄罷戊子以淑妃劉氏為貴妃癸巳以鄭居中知樞密院事吏部尚書管師仁同知樞密院事癸卯以余深為中書侍郎兵部尚書薛昂為尚書左丞工部尚書劉正夫為尚書右丞五月乙巳朔孟翊獻所畫卦象謂宋將中微宜更年號改官名變庶事以厭之帝不樂詔竄遠方丙辰令辟雍宴用雅樂丁巳慮囚戊辰大雨雹辛未以德妃喬氏為貴妃六月甲戌朔詔修樂書管師仁罷丁丑蔡京罷辛巳以何執

中為特進尚書左僕射兼門下侍郎以瀘夷地為純滋
二州庚寅冀州河水溢秋七月丁未詔謫籍人除元祐
姦黨及得罪宗廟外餘並錄用丙辰詔罷都提舉茶事
司在京令戶部在外令轉運司主之八月乙酉封子朴
為雍國公己丑嗣濮王丙申升融州為清遠軍節度己亥韓
忠彥薨九月癸丑封子棣為徐國公己未賜天下州學
藏書閣名稽古冬十月癸丑減六尚局供奉物十一月

丁未詔算學以黃帝為先師風后等八人配饗巫咸等
七十人從祀己巳蔡京進封楚國公致仕仍提舉哲宗
實錄朝朔望十二月己亥罷東南鑄夾錫錢是歲江淮
荆浙福建旱秦鳳階成饑發粟賑之蠲其賦陝州同州
黃河清閭婆占城夏國入貢瀘州夷王募弱內附

四年春正月癸卯罷改鑄當十錢辛酉詔士庶拜僧者
論以大不恭丁卯夏國入貢二月庚午朔禁然頂煉臂
刺血斷指庚辰罷京西錢監甲申詔自今以賞進秩者

母過中奉大夫己丑以余深為門下侍郎資政殿學士
張商英為中書侍郎戶部尚書侯蒙同知樞密院事壬
辰罷河東河北京東鑄夾錫鐵錢三月庚子募饑民補
禁卒詔醫學生併入太醫局筭入太史局書入翰林書
藝局畫入翰林畫圖局學官等並罷甲寅敕所在振恤
流民癸亥詔罪廢人稍加甄敘能安分守者不俟滿歲
各與敘進以責來効丙寅賜上舍生十五人及第戊辰
詔上書邪下等人可依無過人例今後改官升任並免

檢舉夏四月己卯班樂尺于天下癸未蔡京上哲宗實

錄丙申立感生帝壇丁酉詔修哲宗史五月壬寅停僧

牒三年丁未彗出奎婁甲寅立詞學兼茂科丙辰詔以

彗見避殿減膳令侍從官直言指陳闕失戊午赦天下

壬戌改廣西黔南路為廣南西路癸亥治廣西妄言拓

地罪貶帥臣王祖道為昭信軍節度副使甲子貶蔡

京為太子少保丙寅余深罷六月庚午御殿復膳乙亥

以張商英為尚書右僕射兼中書侍郎壬辰復向宗回

為開府儀同三司漢東郡王乙未慮囚丙申薛昂罷秋
七月辛丑復罷方田戊申封子樛為冀國公八月乙亥
以劉正夫為中書侍郎侯蒙為尚書左丞翰林學士承
旨鄧洵仁為尚書右丞戊寅省內外冗官庚辰以資政
殿學士吳居厚為門下侍郎丁亥行內外學官選試法
閏月辛丑詔諸路事有不便於民者監司條奏之癸卯
改陵井監為仙井監辛酉詔戒朋黨以張閣知杭州兼
領花石綱九月丙寅朔日有食之冬十月丁酉立貴妃


鄭氏為皇后鄭居中罷戊戌太白晝見以吳居厚知樞
密院事十一月乙丑朔朝景靈宮丙寅饗太廟丁卯祀
昊天上帝于圜丘赦天下改明年元丙戌罷拱州為襄
邑縣十二月庚戌改諡靖和皇后為惠恭是歲夔州江
水溢海水清出宮女四百八十六人南丹州首領莫公
晟內附

政和元年春正月己巳以賢妃王氏為德妃壬申毀京
師淫祠一千三十八區戊寅封子拱為定國公丙戌廢

白龔二州壬辰詔百官厲名節二月壬寅冊皇后乙巳
詔陝西河東復鑄夾錫錢丙午以太子少師鄭紳為開
府儀同三司三月己巳詔監司督州縣長吏勸民增植
桑柘課其多寡為賞罰癸酉以吏部尚書王襄同知樞
密院事夏四月乙卯罷陝西河東鑄夾錫錢丙辰慮囚
立守令勸農黜陟法丁巳以淮南旱降囚罪一等徒以
下釋之五月癸亥詔四川羨餘錢物歸左藏庫戊辰改
當十錢為當三己卯東南有星晝墮丁亥解池生紅鹽

六月甲寅復蔡京為太子少師秋七月壬申以疾愈赦天下癸未廢平從二州為砦八月乙未復蔡京為太子太師丁巳張商英罷戊午詔監司部內官吏一歲中有犯罪至三人以上雖不及三人而或有曾薦舉者罪及監司九月戊寅王襄罷丁亥封子栻為黃國公是月鄭允中童貫使遼以李良嗣來良嗣獻取燕之策詔賜姓趙冬十月辛卯以用事之臣多險躁朋比下詔申儆庚戌封昭化軍節度使宗粹為信安郡王辛亥貶張商英

為崇信軍節度副使十一月壬戌以上書郭等及曾經
入籍人並不許試學官丙子封子榛為福國公十二月
己酉詔臺諫以直道覈是非毋憚大吏毋比近習辛亥
廢鎮州升瓊州為靖海軍是歲虔州芝草生蔡州瑞麥
連野河南府嘉禾生野蠶成繭出宮女八十人交趾夏
國入貢



總校官庶吉士臣張能照

校對官檢討臣蕭九成

謄錄監生臣王元勛